

職方典第一千一百二十七卷

漢陽府部彙考一

漢陽府建置沿革考

府志

本府

唐虞荊州地禹貢九州荊及衡陽惟荊州江漢朝宗於海導山內方至於大別導水過三澨至於大別南入於江商爲荊楚地周文王之化被於江漢作漢廣之詩召公所巡行者也分封爲鄖春秋夷王時楚併其地時楚子熊渠甚得江漢民和乃興師伐庸揚粵至於鄂後滅鄖以封其臣鬬氏赧王二十七年秦拔楚置南郡漢爲江夏郡安陸縣地漢書地理志江夏郡縣十四首安陸註曰橫尾在東北古文以爲陪尾山今山在德安府安陸縣東北四十里通志嘗辨其非蓋漢初地廣民稀安陸一縣實兼今雲夢孝感安陸漢陽之地而江夏郡治固在本府臨嶂山去漢口五十里至孫權築黃鵠東北之城乃始徙治江東而江夏之名歸於沙羨爲五代以來之夏口矣安陸始終不離於臨嶂德安之安陸非古也獻帝末沔口爲重鎮劉表使黃祖爲

江夏太守表守郤月沙羨二城皆在沔口之左三國屬魏青龍後屬吳始置魯山縣嘉禾四年使陸遜諸葛瑾屯之時曹操赤壁敗後遂與吳蜀三分荆州北境屬魏西屬蜀東南屬吳今境在荆州東晉初仍江夏郡名別置沌陽縣於上昶尋移臨嶂上昶城不知所在第以縣名度之應在沌水之陽而府治西南櫛山之下數里有諸葛城者其墟正臨沌流山水奔會氣勢雄傑或卽上昶廢城也後縣雖治臨嶂沌陽之名未改酈道元注水經合沔沌爲一遂若沌陽在臨嶂之西同臨漢水者然蓋道元未履南土故耳其實沌陽移治臨嶂若夏口之移於沙羨與安陸之移於德安也後又置安陸縣秦志曰按漢江夏郡有安陸縣晉沿革與漢同而不載沌陽似初置沌陽廢安陸後置安陸廢沌陽也今考愍帝建興三年周訪擊杜曾至沌陽安帝元興三年桓振遣孟山圖據魯山城桓仙客守偃月壘而劉宋齊梁皆有沌陽縣不得云置安陸時便廢沌陽也然沌陽移於臨嶂爲江夏郡治矣安陸縣城未詳何所豈在雲夢漢川之間乎蓋晉後又析江夏置安陸郡也安陸之郡漢以來於江夏爲屬縣於臨嶂爲治所自東漢始分郡名及東晉遂分郡界而安陸漸移於德安矣然猶未盡變古也觀五代之以安陸屬郢州趙宋

之以德安治臨嶂則漢陽安陸始終未相達絕矣獨沌陽曲陵馬騎漢津諸廢城無可考耳徙江夏郡治於夏口按考義熙元年是時江夏已稱夏口之名宋沌陽縣屬郢州江夏郡齊沌陽縣屬郢州江夏郡蕭衍始築漢口城守魯山梁更爲梁安郡西魏改魏安郡兼置江州尋改郡曰汢川按魏收地理志梁安郡領縣二濟陽陽城屬光州郡治濟陽又梁安郡治建昌城領縣一梁興屬北江州無魏安郡也後周增置甌山縣今甌山下廢江州更名復州屬竟陵郡亦曰沔州五代志沔陽郡甌山縣梁置梁安郡西魏改曰魏安郡置江州廢帝三年改曰沔州資治通鑑臨海王光大元年周與陳旣交惡周沔州刺史裴寬白襄州總管請益戍兵并遷城於羊蹄山以避水胡三省註曰甌山有陽臺山在漢川之南三十五里土俗訛爲羊蹄山按此則梁魏之郡後周之州俱治甌山而復自甌山移於陽臺也通志秦志俱云甌山屬復州景陵而竟遺沔州之名未知何故又五代時魯山沌口歲歲用兵亦未知定屬誰縣陳梁角立漢爲要地周齊亦分據焉考陳宣帝大建五年伐齊郢州刺史李綜克澠口城是魯山之東四十里卽齊地也梁末陳初有江州又有北江州江州重於梁而北江州奪於西魏亦爲梁置通鑑王琳遣

樊猛襲據江州又以北江州刺史魯悉達爲鎮北將軍而陳又置北江州於南陵與魏之所建不同矣北齊師助王琳伐陳先守魯山琳敗棄城走陳文帝令南豫州刺史程靈洗守之大建二年賂周以魯山郡注曰得魯山則全有漢沔是梁陳周齊皆嘗分據漢陽而後乃全并於周曰江州沔州魏安郡魯山郡甌山縣沌陽縣灊口城沌口城名亦夥矣總不離於漢陽百里內外也梁江州一在隆山一在潯陽獨北江州治鹿城關領梁安等六郡而五代志曰黃州木蘭縣梁曰梁安郡豈漢陽割而東屬於黃耶又按五代志竟陵郡舊置郢州所領有漢東縣舊曰上蔡魏收志郢州有汝南郡胡三省謂汝南郡卽在漢東縣城宋白晉汝南郡人流寓夏口因僑立汝南郡汝南縣於潼口荆湘記云金水北岸有汝南舊城是也金水卽金口其北爲大小軍山此地亦有古郡縣矣蓋漢南江北建立不常東則屬於梁安郡爲江州地西南則屬於魯山汝南郡爲郢州地西北則屬於汭川郡爲沔州地北則屬於安陸郡爲安州地無一定也隋開皇十七年置漢津縣屬復州秦志曰復改復州曰沔州今之沔陽也唐武德四年置沔州始在今府治大業初改漢津爲漢陽與甌山縣並隸復之沔陽郡自此始有漢陽之稱前此漢陽

俱在漢中府沔州此但名沔口唐平朱粲蕭銑乃改甌山曰漢川尋以沔陽郡之漢陽漢川置
沔州漢陽郡漢陽之別爲郡統二縣也自此始其自臨漳遷今治也亦始於此按漢武元魏俱
置漢陽郡在今秦州後周隋五代周俱置沔州今沔陽州宋改興州爲沔州入洛陽縣非今之
沔陽也天寶元年改漢陽郡爲沔陽郡時改天下之州爲郡乾元初復爲沔州肅宗復郡曰州
建中二年州廢四年復置寶曆二年牛僧孺節度武昌欲損冗官奏廢沔陽以漢陽漢川入鄂
州屬淮南道五代屬吳楊行密稱吳後屬南唐俱淮南地周世宗顯德五年平淮南始與南唐
畫江爲界割漢川隸安州今德安府而以漢陽縣置軍宋初仍爲軍統二縣漢陽漢川後改漢
川爲義川治劉家隔太平興國二年避太宗諱改義川曰漢川屬漢陽軍漢陽軍領漢陽漢川
始此是時始有漢川之名前此皆在秦蜀熙寧四年廢漢陽軍爲漢陽縣省漢川爲鎮併其地
入縣屬鄂州蓋王安石之徒所議也元祐元年復爲軍崇寧七年徙德安府治於臨嶂山領縣
四安陸應城應山孝感其漢陽軍隸復州紹興五年八月改軍爲鎮使兼知縣事尋復漢川縣
七年閏十月從岳飛請復爲軍元仍爲軍統縣如宋至元十四年陞爲散府其年行中書省遷

於湖南以鄂州設湖北道宣慰司府隸之統漢陽漢川十八年五月行中書省遷治鄂州宣慰司徙治漢陽十九年八月罷宣慰司以府隸行中書省省治鄂州至元中德安北徙自臨嶂復還安陸明初仍爲府統縣如元屬湖廣布政司武昌道洪武九年五月革府以二縣隸武昌府十三年復府如故正德十三年左都御史陳金以漢陽一府統二縣僅二十餘里欲增州縣以全府治奏以沔陽來屬添設府同知一員知沔陽州李濂奏罷并革同知

皇清因之

漢陽縣

附郭

漢初置安陸縣地屬江夏郡東漢因之晉初置沔陽縣於臨嶂山屬江夏縣尋廢入安陸南北朝宋齊梁俱屬江夏郡隋開皇末置漢津縣屬復州大業初改漢陽屬沔陽郡唐武德初置沔州後廢州以地入鄂屬淮南道五代周世宗平淮南以漢陽縣置軍屬安州宋廢軍爲縣紹興中復置軍元至正中陞漢陽府明初武昌府隸武昌道洪武九年裁後復置仍隸武昌道

皇清因之編戶一十九里

漢川縣

晉屬江夏郡南北朝西魏改魏安郡兼置江州改郡曰漢川後周置甌山縣廢江州隋開皇初郡廢以縣屬沔州唐析漢陽置漢川縣屬鄂州五代屬安州宋初改爲義川縣後改曰漢川屬漢陽軍熙寧中并入漢陽縣元祐初復置縣元明俱屬漢陽府

皇清因之編戶八里

漢陽府疆域圖

黃陂縣界



武昌府江夏縣界

沔陽州界

夢雲縣界

漢陽府疆域考

府志

本府

東南界江至武昌府七里

東北至黃州府治水陸各一百八十里

西北至德安府水

路三百八十里陸路三百二十里

西南至安陸府沔陽州治水路四百七十里陸路四百

里自府治至

京師水路五千四百八十五里陸路三千一百五十里

舊志郡人陳明德云嘉靖間臺司僉

議漢陽府爲省會唇齒之邦控轄甚隘而地連沔陽景陵黃陂孝感曩知府喻三位請以益

漢尋議承天府已割石首於荊州惟孝感黃陂去伊府治三百里界漢陽僅數十里士民稱

便兼以漢口黃陂街大率黃孝人也嗣是推官陳向庭力主其議不果今黃孝田屬漢陽土

民者居半增二縣以壯省輔是在當軸者留以益郡治蒞茲者其加之意焉

按弘治嘉

靖間曾有增屬漢陽之議以景沔鄉紳持論不同乃止然割附近黃孝二邑以增郡治國勢民

情允稱便利

漢陽縣 附郭

東南以大江爲界

西南至沔陽州界二百四十里自界至沔陽州治一百六十里

西

至漢川縣界九十里自界至漢川縣治三十里

北至黃陂縣界二十里自界至黃陂縣治

六十里

漢川縣

東至漢陽縣界三十里自界至漢陽縣治九十里

南至沔陽州界一百里自界至州治一

百八十里

西至景陵縣界九十里自界至景陵縣治七十里

北至雲夢縣界四十里

自界至雲夢縣治五十里

東南至孝感縣界五十里自界至孝感縣治五十里

西北

至應城縣界六十里自界至應城縣治六十里

形勝附

府總

書禹貢江漢朝宗于海

元和郡志前枕蜀江北帶漢水

唐賈至秋興亭記仰眠大別

之固俛眺滄浪之浸閩吳蜀樓船之殷鑒荆衡澤藪之大

通鑑路通荆雍控引秦梁

宋蔡純臣寥廓臺記據鳳棲之峻峯倚大別之巨麓蜀江西來漢水東入山光水色四環交映
圖經漢陽東握江漢表以大別之山臨高阻深其勢陜而險其基完而固與武昌並峙方七里
而近蓋左右翼蔽爲磐石安也附郭之縣亦稱漢陽編戶十九里有鳳棲之岡郎官之湖其巔
聳而鎮曰九真之山山麓有九泉其支起爲龍霓三峯鼎立中有雲滃然則雨漢水別爲沔出
新灘其一與沌水合出沌口灑水下黃陂與淪淩二水合流同入于江其北百二十里曰漢川
縣編戶八里有山如甌曰小別山迤南爲龍門平眺石鏡紆睇陽臺以臨漢皋沮水會之曰水
出縣西北透而南過沮水與漢江合若乃地接會郡水陸交輓往來差使乘輶浮舳銜尾而取
道故供億視他郡獨繁乃僅僅取給于兩縣其窘促可知也矧其地當漢水下流歲一泛溢導
之不注防之難遏則蕩爲沮洳之場吏第束手耳故其民不得已棄耒耜而丐命于湖澤可念
也然兩縣土風勁悍漢川爲甚劉家隔吭扼雍梁腋引吳越爲商舶之輳稍稱繁殷乃遊民時
羣不逞出沒飄忽莫可誰何往來盜掠于鄙令率兵逐之竟截其雙耳去所爲不虞之戒彌甚

武昌云

漢陽府星野考

府志

分野

春秋緯自大別以東至雷澤九江荊州屬衡星

按漢書天文志南宮朱鳥權衡孟康注曰

太微爲衡也星經玉衡北斗第五星主荊州嘗以五卯日候之

大別郡之鎮山自此以東

屬衡則不端主翼軫然周回數百里內又未可拘也

元命苞軫星散爲荊州

史記翼

軫荊州翼二十二星凡十九度軫四星凡十七度也

晉書江夏入翼十二度

唐書翼

軫鶉尾之次已初起張十五度中翼十二度終張九度其分野自房陵白帝而東盡漢之南郡

江夏東達廬江

宋天文志北斗第二星曰璇其分爲楚

按翼十二度爲江夏之分則

今武昌興國江夏嘉魚蒲圻咸寧崇陽通城大冶通山漢陽漢川黃州黃岡蘄水黃陂羅田麻城蘄州黃梅廣濟黃安雲夢安陸應城孝感諸地是也一度計二千九百二十三里

按通

志載星野正占皆主陳卓邢昺之言漢陽列于翼十二度矣又引春秋文耀鉤云大別以東并

屬衡星則一郡而有二占也夫度之廣遠至有二千餘里其中五星次舍客曜推移爲祥爲咎豈片丸黑子地所能當而況雜應紛紜如晉宋天文志所云牛女之間天文之內皆主楚地候悉不爽乎噫天道遠矣必有知而詳言之者

漢陽府山川考

府志

本府 漢陽縣附郭

大別山在郡城東北半里禹貢導嶓冢至於荆山內方至於大別蔡氏注曰左傳吳與楚戰濟漢而陣自小別至於大別蓋近漢之山今漢陽軍漢陽縣北大別山是也地志水經云在安豐者非是大別一名魯山又名翼際桑欽水經江水又東逕魯山南酈道元注曰古翼際山也山上有吳江夏太守陸渙所治城舊江夏治安陸漢高帝六年置吳乃徙此城中有晉征南將軍荊州刺史胡奮碑又有平南將軍王世將刻石記征杜曾事有劉琦墓及廟山左卽沔口舊志云吳置魯山縣梁武築漢口城以守魯山東晉侯曰吾自圍魯山以攻沔或云鳳棲山西有魯肅廟故以鳳棲迤西名魯山朱志曰余觀大別鳳棲南北并峙其間無他山魯山爲大別別名

無疑今詢之故老別山兩形前爲龜山後爲魯山其說近是

鳳棲山在府治後宋知軍劉

辟疆記曰古有鳳凰棲於此山之林故名按吳孫權黃龍元年鳳凰見於夏口始卽帝位或卽此也 梅山在縣治西四里其山多梅今無 磨旗山在縣治西二十里 漢南山在

縣治西二十里漢水之南故名洪武二十二年十一月楚昭王射虎於此其山三峯並峙又名

三山景

女郎山在縣治西二十里舊志載楚襄王會神女處

湯家山在縣西二十里

衆湖中環以官寨三山諸山聚以龍王鄧官諸水雲起則雨中有簸箕洞山勢廻轉如洞也萬曆間土人以漢關壽亭宋岳武穆駐兵有功設像祀之題曰關岳祠 湖蓋山在縣治西北

二十里其形似蓋南臨漢水西帶大湖

吳家山在縣治西北三十里

空山在縣治西

北三十里

馬頭灘山在縣治西北三十里

香城山在縣治西南四十里通志云西北

三十里

柏泉山在縣治西北四十里相傳自禹祠古柏其根直透於此語云柏泉無曲通

八十里寒泉是也有古井井底雙魚動躍泉枯則柏根并現

廣王山在縣治西北四十里

文寺山在縣治西南四十里下臨沌水斜對龜山蕭司成世居此地

漢陰山在縣治西四

十五里以漢陰丈人得名一曰馬鞍山

煙樓山在縣治西南五十里

大軍山在縣治

西南六十里水經江水東逕大軍山南注曰山東有山屯夏浦江水左逕江中有石浮出謂之節度石右塗水注之舊志云吳魏相持陳軍兩山之間故名故老相傳元時風雨之際則聞鐘鼓之聲山高百餘丈九真龍霓大別顏頤稱巨觀焉每出雲蒸霧則數十里內皆雨矣 小

軍山在縣治西南五十里與大軍山近

臨嶂山在縣治西六十里下臨漢水水經注曰沔

水又東逕臨嶂故城北晉建興二年太尉陶侃爲荊州鎮此舊志謂晉江夏郡沔陽安陸縣宋德安府皆在此按水經言沔水東逕沔陽縣北處沔水之陽也沔去漢甚遠不當以漢冒沔之名且沈約志云沔陽縣在江左屬江夏郡江左時之江夏郡治於安陸而沔陽爲其屬縣明矣

既與安陸分爲兩縣豈得同在一山今定以安陸爲臨嶂故城而別考沔陽廢蹟可也臨嶂一名城頭山勢頗盤屈猶存城址 櫓山在縣治西南六十里諸峯逶迤直抵沔水上有武侯

廟或傳爲徐孺子讀書處

龍霓山在縣治西南六十里兩山並峙雲起則雨戴金曰山自

九真山麓發脉逶迤三十餘峯至是三峯突起二峯端巖如釜一峯秀拔如筍

觀山在縣

治西南六十里舊白鶴觀遺址

陽帖山在縣治西南六十里俗曰羊帖山也

考老山

在縣治西南六十里

麥山在縣治西南六十里按麥音查張也開也

大潭山在縣治

西南六十里

烏梅山在縣治西六十里

玉笋山在縣治西七十里輿地紀勝云其山

有白石參差如笋故名

千子山在縣治西南七十里

百人山在縣治西南八十里下

卽大江水經曰江水左逕百人山南注曰昔周瑜與黃蓋詐魏武大軍所起處舊志瑜遺蓋領百人詐降曹公因其不備而掩之宋淳熙間李巽作南樓記曰郡之西南八十里百人山與赤壁對云 九真山在縣治西九十里一名五藏山唐咸通八年賜名仙潛相傳有九仙女煉

丹於此故也又此山九峯相向因名九真高數百丈望之凝然勢如遊龍佳氣鬱然面爲郡城

之幹背臨太白之壑雲物所出神靈所棲也輿地紀勝云上有煉丹壇九真廟又有九泉水甚

清澈舊志云九泉秋冬不涸或旱郡守齋潔請其水雨卽應矣山頂有九真觀近日士民祈謁

者多香火特盛此山爲全郡祖龍漢上諸紳從此發蹟者什之七八

香爐山在縣西南九

十里以形似名元世祖南征嘗駐此

嵩陽山在縣西一百里自此山而東相連小嶺諸山